

**Uunga siunnersuut: Inatsisartut Suleriaasiata allanngortinneqarnera**

(Ataatsimiititaliat ataatsimiinnerini paasissutissat isertuussassat atortussallu isertuussassat suliarineqartarneri, Naalagaaffiit Peqatigiit ataatsimeersuarnerannut Nunat Avannarliit Siunnersuisoqatigiiffiannullu qinerseriaatsip allanngortinneqarnera, Inatsisartunut ilaasortat partiillu aalajangiiffigisassatut siunnersuutaasa aningaasatigut allaffissornikkullu kingunerisassaasa allaaserineqartarnerata Naalackersuisunut nuunneqarnera, apeqquteqaat tunngavigalugu oqallinnerni Inatsisartut oqaaseqaateqarsinnaanerannut periarfissap atorunnaarsinneqarnera, § 37 malillugu apeqquteqartarnermut suleriaatsip erseqqissarneqarnera, Inatsisartut ukiuata aallartittarnerata ukiakkullu ataatsimiinnerup ammarneqartarnerata immikkoornerisa erseqqissarneqarnera, apeqquteqaat aallaavigalugu oqallinnissamik siunnersuutinik tunniussisarnermut kingusinnerpaamik tunniussisarnissamat piffissaliineq, ullormi ataatsimiiffiusussami tullermi oqaluuserisassani immikkoortut nalunaarutigineqassaarneri, Inatsisartut Siulittaasoqarfiannut sinniisussat Inatsisartut ataatsimiinnerinik aqutsisinnaalernerat, Inatsisartut nersornaasiisarneri taamaaqataannillu tunniussisarneri pillugit aalajangersakkap atorunnaarnera, aalajangiiffigisassatut siunnersuutit, apeqquteqaat aallaavigalugu oqallinnerit akunnerlu apeqquteqarfusinnaasoq eqqarsaatigalugit piffissat oqaaseqarfusinnaasut allanngortinneqarneri, sivisunerusumik oqaaseqarsinnaanermik qinnuteqartarnermut piffissaliussap allanngortinneqarnera, ilaqtariiusutsimi isiginiagassanik pingaarutilinnik tunngaveqartumik najuutinnikkallarsinnaalernerq, piffissat sulinnigiffeqarfusut najuutinnikkallarnerillu ukiumoortumik nalunaarummi nalunaarsorneqarnissaannut pisussaaffiup atorunnaarsinneqarnera kiisalu sinniisussanik ataatsimiigiaqqusisarneq.)

**§ 1**

Inatsisartut Suleriaasianni 12. november 2010-meersumi, 22. september 2011-mi, 29. maj 2012-imi, 28. maj 2015-imi aamma 1. juni 2016-imi allanngortinneqartumi, tulliuttut allanngortinneqassapput:

1. § 12-ip kingornanut § 12 a-tut ilanngunneqassaaq:

” § 12 a. Paasissutissanik atortussanilluunniit isertuussassanik ataatsimiititaliaq suliarinnissatillugu ataatsimiititaliap aalajangersinnaavaa ataatsimiititaliap ataatsimiinnera oqaluuserisassaniluunniit immikkoortup aalajangersimasup suliarineqarnera internettimut attaveqarani atortunillu elektroniskiusunik assersuutigalugu oqarasuaatinik angallattakkanik, qarasaasianik tabletinillu atortoqarani ingerlanneqassasoq.

*Imm. 2.* Ataatsimiititaliap aalajangersinnaavaa ataatsimiinnermi atortussat isertuussassat tamarmik taamaallaat pappiaranngorlugit pigineqassasut ataatsimiititaliallu ataatsimiinnerani suliarineqareerunik uterteqqinneqarlutik.”

2. § 26, imm. 3, ima oqaasertaqassaaq:

” Imm. 3. Ataatsimiititalianut, siunnersuisoqatigiinnut aalajangiisartutullu ataatsimiititalianut il.il. ilaasortanik marlunnik amerlanerusunilluunniit qinersisoqassatillugu qanoq amerlatigisunik ilaasortaataqarneq najoqqutaralugu qinersisoqartassaaq, taamaattorli § 26 a aamma 26 b takukkit.”

3. § 26-p kingornanut ilanngunneqassaaq:

” § 26 a. Naalagaaffiit Peqatigiit ataatsimeersuarnerannut sinniisuutitassanik marlunnik taakkulu sinniisussaannik marlunnik qinersisarneq paarlakajaalluni peqataatitaqartarnermik najoqqutaqarneq malillugu pisarpoq, imaalillugu: Partii ilaasortaataqarnerpaaq kattusseqatigiilluunniit ilaasortaataqarnerpaat ilaasortaqassutsikkullu tulliuuttut tamarmik immikkut qinersinerup kingorna ukiumut siullermut sinniisuutitassaminnik ataatsimik taassumalu sinniisussaannik ataatsimik qinersissapput. Partiit kattusseqatigiilluunniit ilaasortaataqassutsikkut pingajuat sisamaallu qinersinerup kingorna ukiut aappaannut sinniisuutitassaminnik ataatsimik taassumalu sinniisussaannik ataatsimik qinersissapput. Partiit kattusseqatigiilluunniit ilaasortaataqassutsikkut tallimaat arferngallu qinersinerup kingorna ukiut pingajuannut sinniisuutitassaminnik ataatsimik taassumalu sinniisussaannik ataatsimik qinersissapput. Partiit kattusseqatigiilluunniit ilaasortaataqassutsikkut arfineq-aappaat arfineq-pingajuallu qinersinerup kingorna ukiut sisamaannut sinniisuutitassaminnik ataatsimik taassumalu sinniisussaannik ataatsimik qinersissapput.

*Imm. 2.* Sinniisuutitaq taassumalu sinniisussaa parteeqatigiissapput kattusseqatigeeqatigiissallutilluunniit. Partii kattusseqatigiilluunniit ataasiinnarmik ilaasortaataqarpat partiip kattusseqatigiilluunniit sinniisuutitaannut sinniisussamik qinersisoqassanngilaq.

*Imm. 3.* Partiit kattusseqatigiilluunniit arlallit amerlaqatigiinnik ilaasortaataqarpat, taakku tulleriinnerat makitsinikkut aalajangerneqassaaq.

*Imm. 4.* Inatsisartuni partiit kattusseqatigiillu amerlassusii katillugit arfineq-pingasunit ikinneruppata paarlakajaanneq aallaqqaataaniit aallarteqqinneqassaaq partiit kattusseqatigiillu tamarmik sinniisuutitaqarnissaminnut periarfissaqareerpata.

*Imm. 5.* Sinniisuutitaasartussat tulleriiaarnerat qinersinerup kingorna inissitsiterfiusumik ataatsimiinnermi aalajangersarneqassaaq qinigaaffimmullu tamarmut atuutissalluni.

**§ 26 b.** Nunat Avannarliit Siunnersuisoqatigiiffiannut sinniisuutitassanik marlunnik taakkulu sinniisussaannik marlunnik qinersisarneq paarlakajaalluni peqataatitaqartarnermik najoqqutaqarneq malillugu pisarpoq, imaalillugu: Partii ilaasortaataqarnerpaaq partiilu ilaasortaataqarnerpaap tullia kattusseqatigiilluunniit tamarmik immikkut qinersinerup kingorna ukiumut siullermut sinniisuutitassaminnik ataatsimik taassumalu sinniisussaannik ataatsimik qinersissapput. Partiit kattusseqatigiilluunniit ilaasortaataqassutsikkut pingajuat sisamaallu tamarmik immikkut qinersinerup kingorna ukiut aappaannut sinniisuutitassaminnik ataatsimik taassumalu sinniisussaannik ataatsimik qinersissapput.

Partiit kattusseqatigiilluunniit ilaasortaataqassutsikkut tallimaat arferngallu tamarmik immikkut qinersinerup kingorna ukiut pingajuannut sinniisuutitassaminnik ataatsimik taassumalu sinniisussaanic ataatsimik qinersissapput. Partiit kattusseqatigiilluunniit ilaasortaataqassutsikkut arfineq-aappaat arfineq-pingajuallu tamarmik qinersinerup kingorna ukiut sisamaannut sinniisuutitassaminnik ataatsimik taassumalu sinniisussaanic ataatsimik qinersissapput.

*Imm. 2.* Sinniisuutitaq taassumalu sinniisussaa parteeqatigiissapput kattusseqatigeeqatigiissallutilluunniit. Partii kattusseqatigiilluunniit ataasiinnarmik ilaasortaataqarpat partiip kattusseqatigiilluunniit sinniisuutitaannut sinniisussamik qinersisoqassanngilaq.

*Imm. 3.* Partiit kattusseqatigiilluunniit arlallit amerlaqatigiinnik ilaasortaataqarpata, taakku tulleriinnerat makitsinikkut aalajangerneqassaaq.

*Imm. 4.* Inatsisartuni partiit kattusseqatigiillu amerlassusii katillugit arfineq-pingasunit ikinneruppata paarlakajaaneg aallaqqaataaniit aallarteqqinneqassaaq partiit kattusseqatigiillu tamarmik sinniisuutitaqarnissaminnut periarfissaqareerpata.

*Imm. 5.* Sinniisuutitaasartussat tulleriiaarnerat qinersinerup kingorna inissitsiterfiusumik ataatsimiinnermi aalajangersarneqassaaq qinigaaffimmullu tamarmut atuutissalluni.”

**4. § 29, imm. 2, ima oqaasertaqassaaq:**

” *Imm. 2.* Suleriaatsimut ilanngussaq 1-imi oqaaseqarnissamut piffissaritit naapertorlugit siunnersuuteqartoq periarfissaqarpoq Siulittaasoqarfimmit akuerineqarluni siullermeerinninnermut saqqummiussinermi siunnersuut kingunerisassaalu pillugit naatsumik nassuiaateqarnissaminut.”

**5. § 33, imm. 1, ima oqaasertaqassaaq:**

” Ilaasortamit, partiimit Naalackersuisunilluunniit inatsisiliornissamik imaluunniit inatsisiliornernik atuuttunik allannortitsinissamik atuukkunnaarsitsinissamilluunniit siunnersuutit Inatsisartut aalajangiivigisassaattut siunnersuutit saqqummiunneqartassapput. Siunnersuut tunngavilersugaassaaq, aalajangiiffigisassatut ilusilerlugu allanneqarsimassalluni qulequtserneqarsimassallunilu.”

**6. § 33-imi imm. 1-ip kingoranut immikkoortut nutaatut ilanngunneqassaaq:**

” *Imm. 2.* Inatsisartut aalajangiiffigisassaattut Naalackersuisut siunnersuutaasa aningaasatigut allaffissornikkullu kingunerisassaasa allaaserineqarnissaat Naalackersuisut pisussaaffigivaat. Inatsisartut aalajangiiffigisassaattut siunnersuutinut Inatsisartunit ilaasortanit partiinilluunniit saqqummiunneqartunut atatillugu akissuteqaateqarnissartik Naalackersuisut taamatuttaaq pisussaaffigivaat. Akissuteqaammi siunnersuutip aningaasatigut allaffissornikkullu kingunerisassai aallaaserineqarsimassapput.”

Imm. 2-8 tamatuma kingorna imm. 3-9-nngussapput.

7. § 33, imm. 6, oqaaseqatigiit siulliit, imm. 7, oqaaseqatigiit siullinngortussat, ima oqaasertaqassapput:

”Siunnersuutit imm. 1-imi 4-milu taaneqartut saniatigut Naalakkersuisunit siunnersuutit uku Inatsisartut aalajangiiffigisassaattut siunnersuutit suliarineqartassapput:”

8. § 36, imm. 4, atorunnaassaaq.

9. § 37 ima oqaasertaqassaaq:

” § 37. Inatsisartunut ilaasorta q pisortat suliaasaataat pillugu paasissutissinneqarnissaminik kissaateqarpat, tamanna Naalakkersuisunut apeqquteqarnikkut pisinnaavoq. Allakkatigut apeqquteqartoqassaaq Inatsisartut Siulittaasuannut tunniunneqartussamik. Inatsisartut Siulittaasuata apeqqut Naalakkersuisunut ingerlateqqissavaa, assilinera Inatsisartunut ilaasortanut allanut nassiutiitigalugu. Apeqqut naatsumik erseqqissumillu oqaasertalernerqarsimassaaq tunngavilersuutitaqassallunilu. Ataatsimik assigiimmillu tunngavilersuutitaqarluni arlalinnik apeqquteqaraanni apeqqutit normulersorneqarsimassapput naqinnerilluunniit malillugit tulleriinnilersorneqarsimassallutik.

*Imm. 2.* Naalakkersuisut apeqqummut akissuteqarnissaminut pisussaaffeqanngillat:

- 1) Naalakkersuisut paasissutissanik akissuteqarnissaminut atugassaminik pissarsisinnaanngippata,
- 2) malunnartumik piffissaq nukissallu paasissutissanik akissuteqarnissamut atugassanik pissarsiniarnermut atortariaqassappata, imaluunniit
- 3) paasissutissat kissaatigineqartut nipangiussisussaataitanermit ilaatinneqarpat.

*Imm. 3.* Akissutip ilusissaa pillugu apeqquteqartup kissaatigisaanut Naalakkersuisut pituttorsimannngillat.

*Imm. 4.* Naalakkersuisut akissuteqaataat Inatsisartut Siulittaasuannut tunniunneqartassaaq, taassumalu akissut apeqquteqartumut ingerlateqqittassallugu, assilinera Inatsisartunut ilaasortanut allanut nassiutiitigalugu.

*Imm. 5.* Apeqqutit akissuteqarfigineqarnissamik tungaanut tunuartinneqarsinnaapput. Apeqqutit allanit saqqummiuteqqinneqarsinnaanngillat.

*Imm. 6.* Apeqqutit Inatsisartut nittartagaanni tamanut saqqummiunneqartassapput. Akissutit isertuussassatut naqissuserneqarsimannngikkunik Inatsisartut nittartagaanni tamanut saqqummiunneqartassapput.

*Imm. 7.* Inatsisartut ataatsimiinnerisa piareersaasiorneqarnerannut atatillugu Inatsisartut Siulittaasoqarfiat sapaatip akunneranut ataasiarluni nalunaaquttap akunneranik ataatsimik sivisussusilimmik apeqquteqartarfissamik aalajangersaasinnaavoq, Inatsisartunut ilaasortat malaatiinnarlugu nalunaarutigeqqaarnagulu Naalakkersuisunut ingerlaannartumik akisassamik apeqquteqarfigisinnaasaannik. Naalakkersuisut nalunaarpata apeqqut akissuteqarfigisinnaanagu suliarinera taamaalilluni naammassineqassaaq. Sapaatip akunnikkaartumik akunnermi apeqquteqarfiusartumi aalajangiisoqarsinnaanngilaq.”

10. § 38, imm. 4, ima oqaasertaqassaaq:

” Imm. 4. Inatsisartut ileqquusumik katersuunnermi Inatsisartut tullianik ileqquusumik katersuunnissaannut piffissaq ataatsimiiffiusussaq aalajangissavaat.”

11. § 40, imm. 2, atorunnaassaaq.

12. § 43, imm. 2, atorunnaassaaq.

Imm. 3-4 tamatuma kingorna imm. 2-3-nngussapput.

13. § 47, imm. 1, ima oqaasertaqassaaq:

” Inatsisartut Siulittaasuata imaluunniit siulittaasup tulliaata siulliup, tulliaata aappaata, pingajuata sisamaataluunniit taakkuluunniit sinniisussaasa akunnerminni isumaqatigiissut malillugu Inatsisartut ataatsimiinneri aquttarpaat.”

14. § 53, imm. 2, ima oqaasertaqassaaq:

” Imm. 2. § 24 naapertorlugu siunnersuisoqatigiiffinnut aalajangiisartutullu ataatsimiititalianut il.il. qinersinerit tamatigut matoqqasumik ingerlanneqartassapput.”

15. § 55 ima oqaasertaqassaaq:

” § 55. Inatsisartut Siulittaasoqarfiata Inatsisartut isumaqatigiinniarneri Inatsisartut nittartagaanni kalaallisut qallunaatullu tamanut saqqummiuttassavai.”

16. *Ilanngussaq 1-imi, Oqaaseqarnissamut piffissarititat*, immikkoortoq ”Inatsisartut aalajangiiffigisassaattut siunnersuutit Inatsisartunut ilaasortanit saqqummiunneqartut:” ima oqaasertaqassaaq:

” **Siullermeerinnineq**

Saqqummiussineq	5 min.
Naalakkersuisut akissuteqaataat	5 min.
Partiit oqaaseqarneri	15 min. (Partii ataaseq apeqqutit 3)
Malitsitut oqaaseqarnerit akissuteqarnerillu	1 min.
Naalakkersuisut naggataarutaasumik oqaaseqarneri	5 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera	5 min. (Partii ataaseq apeqqutit 2)
(Apeqqutit akissutillu tamarmik minutsi ataaseq)	

**Aappassaaneerinnineq – Allanguutissatut siunnersuuteqartoqarsimangippat**

Naalakkersuisut akissuteqaataat	5 min.
Partiit oqaaseqarneri	2 min. (Partii ataaseq apeqqutit 3)
Malitsitut oqaaseqarnerit akissuteqarnerillu	1 min.
Naalakkersuisut naggataarutaasumik oqaaseqarneri	5 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera	5 min. (Partii ataaseq apeqqutit 2)

(Apeqqutit akissutillu tamarmik minutsi ataaseq)

**Aappassaaneerinnineq – Allanguutissatut siunnersuuteqartoqarsimappat**

Naalakkersuisut akissuteqaataat	5 min.
Partiit oqaaseqarneri	10 min. (Partii ataaseq apeqqutit 3)
Malitsitut oqaaseqarnerit akissuteqarnerillu	1 min.
Naalakkersuisut naggataarutaasumik oqaaseqarneri	5 min. (Partii ataaseq apeqqutit 2)
Siunnersuuteqartup naggataarutaasumik oqaaseqarnera (Apeqqutit akissutillu tamarmik minutsi ataaseq)”	5 min. (Partii ataaseq apeqqutit 2)

**17. Ilanngussaq 1-imi, Oqaaseqarnissamut piffissarititat, immikkoortoq ”Apeqquteqaat aallaavigalugu oqallinnerit:” ima oqaasertaqassaaq:**

” Saqqummiussineq	5 min.
Naalakkersuisut akissuteqaataat	5 min.
Partiit oqaaseqarneri	10 min. (Partii ataaseq apeqqutit 2)
Malitsitut oqaaseqarnerit akissuteqarnerillu	1 min.
Siunnersuuteqartup naggataarutaasumik oqaaseqarnera (Apeqqutit akissutillu tamarmik minutsi ataaseq)”	5 min. (Partii ataaseq apeqqutit 2)

**18. Ilanngussaq 1-imi, Oqaaseqarnissamut piffissarititat, immikkoortoq ”Akunnerit apeqquteqarfiusinnaasut:” ima oqaasertaqassaaq:**

” Apeqquteqarneq	1 min.
Naalakkersuisut akissuteqarnerat	1 min.

(Akunneq ataaseq qaangiukkaangat akunneq apeqquteqarfiusinnaasoq naammassineqartarpoq kingulliulluni apeqqutigineqartup akineqarneratigut)”

**19. Ilanngussaq 1-imi, Oqaaseqarnissamut piffissarititat, ilanngussami oqaaseqatigiit kingulliit ima oqaasertaqassapput:**

” Sivilunerusumik oqaaseqarniarluni saaffiginnissutit ataatsimiinnissaq pineqartoq ullormik ataatsimik sioqqullugu ullup qeqqartinnagu tunniunneqareersimassapput. Pisuni immikkorluinnaq ittuni piffissaliussap taassuma sanioqqunneqarnissaa Siulittaasoqarfiup akuerisinnaavaa.”

**20. Ilanngussaq 2-mi § 8 ima oqaasertaqassaaq:**

” § 8. Pisunut § 7-imi taaneqartutut inngitsunut atatillugu qaammatisiutit malillugit ullut 14-it tikillugit najuutinnikkallarnissamut Inatsisartut Siulittaasoqarfiat akuersissuteqarsinnaavoq, taamatut qinnuteqarneq ilaqutariussutsimi isiginiagassanik pingaarutilinnik imaluunniit pissutsinik immikkut ittunik allanik tunngaveqarpat Siulittaasoqarfiup naliliinera malillugu itigartissallugu naapertuuttussaannngitsumik.”

21. *Ilanngussaq 2-mi § 11* atorunnaarsinneqassaaq.

22. *Ilanngussaq 2-mi, § 14-imi imm.1-ip* kingornanut immikkoortutut nutaatut ilanngunneqassapput:

” *Imm. 2.* Inatsisartut Siulittaasoqarfiat taamaallaat imm. 1 malillugu sinniisussamik ataatsimiigiaqqusisassaaq Inatsisartunut ilaasortaq sivikinnerpaamik ulluni 14-ini peqassanngikkaangat, taamaattoq imm. 3 takujuk.

*Imm. 3.* Inatsisartut Siulittaasoqarfiata sivikinnerpaamik ulluni 14-ini peqannginnissaaq imm. 2-mi taaneqartoq sanioqqussinnaavaa sinniisussamik ataatsimiigiaqqusinnginneq Inatsisartut ataatsimiittarfianni ilaasortaatitaqarnerup allanngorneratigut Inatsisartut aalajangiisarnerisa inernerinut sunniuteqarsinnaappat.”

Imm. 2 tamatuma kingorna imm. 4-nngussaaq.

## § 2

Allannguutit 1. januar 2020-mi atuutilissapput, taamaattoq imm. 2 takujuk.

*Imm. 2.* § 37 1. juli 2020-mi atuutilissaaq.

*Imm. 3.* § 26 a aamma § 26 b tunngavigalugit sinniisuutitassanik taakkulu sinniisussaannik qinersineq 2020-mi upernaakkut ataatsimiinnermi siullermeerutaasumik ingerlanneqassaaq.

*Inatsisartut, ulloq xx. xxx 2019*

Inatsisartut Siulittaasuat Vivian Motzfeldt.